

Ord cuschina FMR

La davosa giada

«Pledigns e pledungs»


Durant sis onns ha Madlaina Capeder da Salouf curregi tut ils texts da La Pagina da Surmeir. Ils emprims dus onns ha ella fatg quella lavur anc cun in engaschament tar l'editura da la gasetta, tar l'Uniun Rumantscha da Surmeir (URS). Ils davos quatter onns ha Madlaina fatg il correctorat – en in pensum da 20 % – sco collavuratura e collega en la redacziun da la FMR. Però sin la fin da quest mais da schaner 2025 banduna Madlaina la redacziun. Ella è stada ina collega fitg fidada, engaschada e premurada. Emna per emna ha ella per exempel era realisà la bella rubrica linguistica dals «Pledigns e pledungs». En questa ediziun cumpara quella rubrica (per il mument) damai per la davosa giada, enfin che la FMR haja chattà ina successiun. Nus da la redacziun deplorain in mintga cas ferm che Madlaina chala cun il correctorat e nus l'engraziain da cor per la bella collavuraziun. – Grazia fitgun, Madlaina, e tut il bun!

Gia sin la fin da december 2024 ha era la redactura surmirana Sandra Balzer bandunà la redacziun. Uschia che l'entira «fracziun surmirana» da la FMR è per il mument vacanta. Gia l'atun 2024 aveva la FMR scrit ora pliras giadas las duas plazzas en las gasettas, cun success modest. Perquai saja drizzà qua anc ina giada in appel fervent a l'entir mund surmiran: Nus da la FMR avessan gust da collavurar cun tai! Ils inserats correspundents èn da chattar sin la pagina www.fmr.ch. Il pli simpel e simpatic èsi dentant da simplamain contactar directamain insatgi da nossa squadra. Ils contacts èn da chattar sin la medema pagina.

Quest'emna ha scrit in lectur attent da La Pagina da Surmeir ch'el haja vis che en connex cun la rapportaziun da la bova da Brinzauls vegnia adina scrit da la fracziun da «Vazarouls» (tudestg: Vazerol). Il lectur è da l'idea ch'i fiss atgnamain da scriver per rumantsch «Vasarauls», ed el ha era rendì attent ch'il num vegnia scrit uschia per part er en il fegl uffizial. – Quai po bain esser, perquai ch'i vegn fatg diever mintgatant da furmas dialectalas en ils fegls uffizials. Ma nus da la redacziun empruvain da'ns tegnair vi da la scripziun proponida e normada en il Pledari grond (surmiran). E quel propona be ina suletta varianta: «Vazarouls». Er en noss rapport da quest'emna (paginas 2 e 3) scrivain nus uschia il num da quella fracziun.

Per la redacziun FMR,
David Truttmann, schefredactur

«Nous sfurzagn nign»



Las zonas melnas a «Sur Tgesa Gronda» e «Crest» duessan star a disposiziun per en'eventuala translocaziun d'abitantas ed abitants da Brinzauls a Vazarouls vest. Tot tenor disponibladad vignan er an dumonda igls fons marcos cun stretgigns. Foto MAD

Toni Vinzens/FMR

Siva digl november 2024 vala puspe la fasa cotschna a Brinzauls. Scu tgi vo anavant, n'è betg anc cler. Per igl cass da basigns elaborescha igl cumegn d'Albula/Alvra perchegl venavant igls plans da translocaziun a Vazarouls. Lò duessan pertutgeidas e pertutgias dalla bova pudeir catter en nov datgesa – schi tot vo bagn e sch'els lessan ansomma.

A Vazarouls vest elaborescha igl cumegn d'Albula/Alvra venavant igls plans da translocaziun per las abitantas ed igls abitants da Brinzauls tg'on stua bandunar lour tgesas avant var dus meis, igl november 2024. Tenor igls plans less igl cumegn aveir a disposiziun taragn avonda per la translocaziun, schi Brinzauls stuess neir banduno per adegna. Tge fons tg'el ò an meira a Vazarouls e scu tg'el proceda, ò igl cumegn communitgia igls 17 da schaner 2025 aint igl 83avel bulletign d'infurmaziun davart la bova. I fiss dantant angal en'opziun ed angal pussebel, schi tots pon eir d'accord, uscheia igl mastral digl cumegn d'Albula/Alvra, Daniel Albertin anvers la FMR: «Nous sfurzagn nign.»

Taragn agricol per biagier

Tenor igl 83avel bulletign d'infurmaziun pertotgan igls plans da translocaziun a Vazarouls ena surfatscha da 35 000 m² taragn agricol aint igls quartiers «Sur Tgesa Gronda» e «Crest». Las parcelas pertutgeidas appartignan per part a privats e per part agl cumegn. Tenor en contract digl 1993 vegian dantant privats er en dretg a taragn da biagier sen las parcelas digl cumegn. Per realisar igl plan da translocaziun na fissigl perchegl betg angal necessari d'acquistar igl dretg da compra per igl taragn digls privats, mabagn er tg'igls privats cun dretg a taragn da biagier sen parcelas da cumegn, renunztgan a chel dretg.

Igls costs per la compra purtessan dantant per gronda part igl Cantun e la Confederaziun, dantant angal sot lour cundiziuns, uscheia igl bulletign d'infurmaziun. An ceffras vot chegl deir tg'els subvenziunessan la compra scu er l'equipaziun digl taragn cun 90 % digls costs. Chels èn dantant nias fixos sen maximalmaintg 320 francs per m². Radond la mesadad da chels 320 francs fissan dantant previas per l'equipaziun digl taragn. Igls costs per las tgesas novas purtess la Sieranza d'edifezis digl Grischun (GVG), dantant angal schi sa tracta d'en donn total, scu tgi Daniel Albertin ò explitgia. Chegl vot deir, schi la tgesa a Brinzauls vign destrueda an-